

Headline	Dua pekerja TH rasuah, ubah data dipenjara		
MediaTitle	Kosmo		
Date	15 May 2014	Color	Full Color
Section	Negara	Circulation	218,251
Page No	8	Readership	654,753
Language	Malay	ArticleSize	186 cm ²
Journalist	N/A	AdValue	RM 2,385
Frequency	Daily	PR Value	RM 7,155



Dua pekerja TH rasuah, ubah data dipenjara

KUALA LUMPUR – Mahkamah Sesyen di sini semalam menjatuhkan hukuman penjara tiga dan empat tahun ke atas dua pekerja Lembaga Tabung Haji (TH) selepas mereka didapati bersalah atas tiga pertuduhan berasingan membuat pengubahsuaian kandungan pangkalan data sistem haji dan satu tuduhan menerima rasuah untuk melangkaui giliran mengerjakan ibadah haji empat tahun lalu.

Tertuduh, Afizul Md. Yasin, 35, dipenjara tiga tahun dan denda RM60,000 bagi tiga pertuduhan yang dikenakan atau lapan bulan penjara jika gagal membayar denda.

Roslan Mohamed Som, 48, pula dijatuhi hukuman penjara empat tahun dan didenda RM40,000 atau 16 bulan penjara jika gagal membayar denda.

Afizul selaku juruanalisis kanan sistem, Jabatan Teknologi Maklumat TH manakala Roslan bertugas sebagai kerani di Bahagian Penyelidikan dan Pembangunan TH.

Hakim Mat Ghani Abdullah memutuskan demikian selepas mendapati pihak pendakwaan berjaya menimbulkan keraguan munasabah di akhir kes pembelaan berhubung ketiga-tiga pertuduhan itu.

Bagaimanapun, mahkamah membenarkan penangguhan pelaksanaan hukuman penjara dan denda ke atas kedua-dua tertuduh yang kini digantung tugas dengan syarat jumlah wang jaminan dinaikkan kepada RM30,000 setiap seorang.

Mengikut tiga pertuduhan berasingan, Afizul didakwa mengubah pangkalan data TH dengan menggunakan program khas tanpa kuasa yang mana tertuduh tahu perbuatan itu akan menyebabkan pengubahsuaian kandungan pangkalan data sistem TH.

Dia didakwa melakukan perbuatan itu di Bangunan Ibu Pejabat TH di sini pada 10 Jun, 12 Julai dan 14 Julai 2010.

Bagi Roslan yang bertugas di Bahagian Penyelidikan dan Pembangunan Haji didakwa menerima rasuah RM6,750 daripada Shamsudin Ibrahim sebagai upah untuk membantu menguruskan nama-nama jemaah haji yang tidak layak memunaikan haji pada 2010 supaya dapat berbuat demikian pada tahun itu.

Dia didakwa melakukan kesalahan itu di Jalan Raja Muda Musa, Kampung Baru di sini antara pukul 3.30 petang hingga 4 petang pada 15 Julai 2010.



KERATAN Kosmo! 10 Februari 2012.